

Vega, siempre nombrada,
entre tóos los llugares asturianos,
dende la malfadada
morte del gran menistru Xovellanos!.....

Apar' aquí, y medita:
morte dixé, y non tal: muerr' aquel home
que tién alma precita,
ó fó un Don Náide que la tierra cóme;

mas el que ye pergüenu
y de céncia y vertú trái cometiva,
Dios lu acoye 'n so senu,
y el mundu álzai 'stáutes pa que viva!

II

Fó un maltíriu la vida
d' esti gran xiixonés: duru trabayu,
pe la patria querida,
fasta 'sprimir el céebro y el cuayu.

Cuando maestru, enseña;
cuando xuez, dános reuta la xosticia,
firme com' una peña,
sin pasión qu' lu torcia, nin cobícia;

cuando poeta, canta
al bien y á la vertú: si 'l vicio topa,
fieru, la voz levanta
y frañe, cual batán que frañe 'stopa;

Menistru, da la paga,
que non tien mas, pa la Riál Facienda!.....
¿Ú 'stá quien hoy lo faga?
¿Ú quien hoy no 'mpapiella de fachenda?

El rey, y los llambiones
de la vera, tratárunlu á lo perru,
pagando 'stas aiciones
de céncia y llealtá con el destierru.

Extrañáu dos veces
pe la traición y pe la 'nvidia fuera,
saborgando tristeces
el qu' amor y rispeto mereciera.....

Fasta xugó 'l venenu (*)
nista intriga de mal y de rincores,
que siempre sufre el güeno
nel mundo, y tienen suerte los piores!

(*) Son conocidos los detalles del frustrado envenenamiento que puso á Saavedra en los umbrales del sepulcro, y á Jove-Llanos, en estado de convulsión y parálisis.
(V. SOMOZA.—«Las amarguras de Jove-Llanos»—pag. 57).